



Hirmingerus apud Rauracos iuxta oppidum Seckingense in ualle Frickthal, magne autoritatis homo extitit. Erat enim insigni corporis & animi fortitudine præditus, idq; eo tempore cum Vngari ex suis sedibus profecti, totã Germaniam uastarent, Anno noningentesimo tricesimo octauo. Cum itaque Hungari à lacu Podmico secundũ Rhenum descendissent, atq; oppidum Seckingen se cum nobili illo monasterio diripere statuissent, Hirmingerus ille eorũ conatibus fortiter obuiam processit. Occuparant Vngari copijs diuisis utranque Rheni ripam, atq; ex parte Germaniæ pōtem construere cœperant, ut commodius in oppidum

peruenire possent. Interea Hirmingerum collectis passim apud Rauracos & proximos Heluetios copijs, magno animo Vngaros cis Rhenum castra habentes, noctu aggressus est. Eius etiam regionis aliquot incolas in proximo monte cum facibus collocarat, atq; ijs præceperat, ut quamprimum prælium audirent, faces accenderent, atq; clamorem excitarent, ut splendor ille ad loca humiliora penetraret, atq; hostes metu maioris exercitus terrerentur. Nec eum spes fefellit. Itaq; Vngarorum magna pars eo in loco interfecta, atq; pluri-
rimi etiam dum fugam capescerent, in Rheno submersi sunt.